

Universidad di Aruba ta presenta lesnan den cuadra di OGM

ORANJESTAD - Recientemente a tene e lesnan pa e programa di estudio "Organization, Governance and Management" (OGM) den Aula di Universidad di Aruba. E tres les modelo tabata Diversity; implications for organizations, Client Based Thinking y Constitutional and Administrative Law.

E grupo cu a atende tabata chikito pero entusiasma y motiva. Nan a cera conoci cu algun docente, cuater estudiante y tambe nan a haya un splicacion di e estudio di OGM. Despues di kibra e ijs docentenan Helmut Vink, Mieke de Droog y Yolanda Richardson hunto cu e studiantenan Ghislaine Nicolaas, Thais Franken, Rashida Tromp y Jonathan Henriquez a duna tres les simula.

Contenido

Sra. De Droog a haci un inventarisacion di e experiencia di esunnan cu tin interes pa sigui e curso como cliente ora nan haya un servicio. Despues el a laga nan presenta e experiencianan aki pa nan reflexiona y comprende kico por wordo mehora ora ta duna servicio. E mehoracion aki tin di haber cu puntonan cu ta visibel pa clientenan y tambe den procesonan cu no ta visibel pa cliente. Sra. Richardson a muestra dos pelicula cortico tocante diversidad y hunto

cu dos articulo internacional e interesadonan a haya chens pa traha den grupo, contesta algun pregunta y discuti over di algun ponencia. Sr. Vink a uza dos articulo di corant local pa muestra e relacion y complehidad di decisionnan di gobierno pa un individuo of pa comunidad henter. Na final e studiantenan cu ya ta studiando OGM a contesta diferente pregunta cu e posibel studiantenan nobo tabata tin.

Preguntanan

Un di e preguntanan cu a resalta ta si ta posibel pa combina e estudio cu trabao. Tur e studiantenan actual a bisa cu e ta posibel, pero no facil. Mas importante ta cu nan ta definitivamente contento cu nan a tuma e stap pa studia OGM. Pa e motibo aki tin cu a dicidi cu nan ta dal un stap patras financieramente. Un otro punto cu a resalta ta cu nan ta traha hopi duro pero nan ta siña masha hopi mes y ta mira con nan por aplica loke nan a siña ya caba. Den e cuadro aki Jonathan Henriquez a bisa esunnan cu ta duda si nan mester registra pa cuminsa studia, cu dor di studia OGM e ta traha duro pero pa un miho futuro.

Inscripcion ya ta andando y ta spera cu hobennan y esunnan cu tin interes den ciencia di organisacion y maneho of cu ta desea un cambio den nan carera lo haci uzo di e oportunidad brinda pa studia aki na Aruba mes. □

